



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

PM Modi-i tzyim nung apu
talangtiba Atal Setu semzüksüogo

ISL: Adrian Luna melena
Cernychshimogo



VOL. XXI NO. 90 (ADOK 90) DIMAPUR

KÜPTOKNÜ (SATURDAY)

ANJETI (JANUARY) 13, 2024

₹ 5.00



Scan for more information

Hamara Sankalp Viksit Bharat

Modi Sarkar ki Guarantee

Linük renlokba nung tetsürtemi shilem tajung agiba

India nung tetsür pilots 15% lir aser iba ya
alima nung teimtiba lir



Linük tarutsü tia kanga majung: MLA Azo

Kohima, January 12, 2024

(TYO): India nung opposition MP tem aika külemi anentsüba ajanga yimtenren ken o tulu ka adokogo aser iba ya Indian Parliamentary maparen asoshi lendong ka lir ta MLA & NPF Legislature Party leader Kuzholuzo (Azo) Nienu-i ashi.

"Iba inyakyim ajanga Namocracy olen kanga jembir aser parliamentary democracy atema tatem o züluteper" ta pai ashi.

Phek district kübok Porba yimtsüng nung Secheku Wrestling Association (SWA) 29 buba wrestling meet nung o jembidang MLAAzo-i iba ya ashi.

December 14 nungi December 21 tashi Opposition MP 146 tashi Lok Sabha aser Rajya Sabha nungi anentsüogo, ta pai ashi.

"Parnok anentsüba sülen Lok Sabha nung BJP anema noktakba MP 42 dang anüing aser Rajya Sabha nung Opposition 50% jungnüa mali akum. Iba ajanga Centre sorkari Opposition benches tazüing yutsür, o atsütep aser olemtep kecha melii dang ozüing aika yangluogo" ta Azo-isa shisem.

Iba ajanga Criminal Law Amendments amala Bill tem olemtep kecha melii dang agizükogo, ta paisa ashi.

"Modi sorkari kanga junga shisadanger ang Opposition pur madak tashiyim inyak ta political observers-i ashir. Külen Opposition-i iba mapa ya Parliamentary democracy ashiochtsüba lir aser BJP-i democracy samatsünür ta aitsür" ta NPF Legislature Party leader-isa metetdaksü.

"Tesüiba küm 15 tsüingda Lok Sabha aser Rajya Sabha nung senden magitetba aser MP timi tim masüba inyakbatem ataloka aruogo saka tanü tensa

asadangra, MP temi Union Home Minister dang Parliament nung atalokba o jembitsü takhangba agütsüba atema ang anentsü" ta Azo-i ashi.

Opposition agientsü, olemtep aser o atsütep kecha melii tongtipang Bill tem agizükba ya parliamentary democracy tarutsü atema lendong lir ta paisa ashi.

Centre sorkari Central Agencies asem- CBI, ED aser NIA tim mesüi amshir aser iba ya tebilemtsü tulu ka lir. Narendra Modi-i aniba NDA sorkari opposition lennir 118 anema bushisüngdang tenzükba ajanga iba kuli sayur. BJP aser parnok lennirtem anema ken o tem atemabo parnoki kecha meinyaker, ta Azo-isa shisem.

Yimtenren tebang maittsü atema Supreme Court-i 1998 küm Central Vigilance Commission-i anir luden ka ajanga CBI director shimtsü latetja lir ta paisa ashi.

Enforcement Directorate (ED) ya opposition lennirtem aser BJP anemertem anema amshir. 2014 küm NDA sorkar akümba sülen ED tim mesüi akümba kanga buluogo aser parnoki yimtenren lennir 121 anema bushisüngdang tenzükba aliba nung opposition lennir 115 (95%) lir, ta Azo-isa ashi.

Külen, tebilemtsü kaji tawa Rajya Sabha nung Chief Election Commissioner aser tanga Election Commissioners (Appointment, Conditions of Office and Terms of Office) Bill, 2023 agizükba ya ozüing akümtsü aser iba ya Supreme Court-i latetja aliba dang nungi khenyongi balaka, ta paisa metetdaksü.

India nung elections tiptema aser ochishia agitsü atema Election Commission of India ya shinga kübok masütsüla aser iba ya democracy atema kanga tongtipang lir, ta Azo-i ashi.

Nagaland nütsüng yongsük lakh 23.67 akümtsü

Kohima, January 12, 2024

(DIPR): 2030 tashi nung Nagaland nütsüng yongsük 23.67 lakh akümtsü ta Nagaland Directorate of Economics and Statistics-i metetdaksüogo.

2011 census nung Nagaland nütsüng yongsük 19,78,502 liasü ta ashir.

2030 küm tashi nung Nagaland nütsüng yongsük 19,78,502 aliba nung 3,88,498 renloker 23,67,00 akümtsü ta

Information Technology and Communication, Evaluation, and Economics & Statistics Advisor H Sethrongkyu Sangtam-i ashi.

2011 census nung district shia nütsüng yongsük:

Kohima - 2,67,988, Dimapur - 3,78,811, Phek - 1,63,418, Peren - 95,219, Mokochung - 1,94,622, Wokha - 1,66,343, Zunheboto - 1,40,757, Tuensang - 1,96,596, Kiphire - 74,004, Longleng - 50,484 aser Mon - 2,50,260.

Union Minister Dr. Mansukh Mandaviya-i mapatong aika lapoktsü Nagaland nunga mapatong aika inyaktsü lung azüngtsüogo

Dimapur, January 12, 2024

(TYO): January 12, 2024 nü Union Minister Dr. Mansukh Mandaviya-i mapatong aika lapoktsü aser kar inyaktsü atema lung azüngtsüogo.

January 12, 2024 nü Union Minister, Ministry of Chemical & Fertilizer & Ministry of Health & Family Welfare, Government of India Dr. Mansukh Mandaviya-i National Institute of Pharmaceutical Education & Research (NIPER), Gawahati nung campus tasen lapoktsü.

Paisa NIPER Hyderabad aser Raebareli atema lung azüngtsü aser Chapel Hall, District Hospital, Dimapur nung North East Region atema Health Infrastructure Projects lapoktsüba den kar yanglutsü lung azüngtsü.

"October 2021 nung tenzükba PM-Ayushman Bharat Health Infrastructure Mission (PM-ABHIM) kübok Centre sorkari Nagaland nung District Hospitals 11 nung Integrated Public Health Laboratory (IPHLs) units 11 aser Dimapur Hospital nung Critical Care Unit (CCU) ka yanglutsü lemkütsüogo" ta Health & Family Welfare Minister Paiwang Konyak-i ashi.

Nagaland State nung item mapatong ya 2021-22 nungi 2025-26 tashi nung inyaktsü, ta

pai ashi. Iba scheme ya Centrally Sponsored Scheme ka lir aser Central Sector Components kar dena state aser UT tem nung health system tajungba kümdaktsütsü. Iba ya Sustainable Development Goals (SD)-3 indicators aser National Health Policy, 2017 den liromedema lir, ta Minister Paiwang-isa ashi.

PM-Ayushman Bharat Health Infrastructure Mission (PM-ABHIM) ya Public Health System tajungba kümdaktsütsü atema lir ta paisa shisem.

Ministry of Health Family Welfare, Government of India-i Nagaland nung IPHLs aser Critical Care Units yanglutsü lemkütsüba atema pelar ta Paiwang-isa shisem.

Union Minister Dr. Mansukh Mandaviya-i linük nem video conference ajanga mapatongtem lapoktsüba sülen Arunachal Pradesh, Assam, Manipur, Meghalaya, Mizoram, Nagaland aser Tripura nung Healthcare infrastructure balala atema lung azüngtsü.

PM-ABHIM ya healthcare infrastructure tashi itdaktsütsü atema scheme tulutiba lir aser iba ya primary, secondary & tertiary care services nung temulung agütsür. PM-ABHIM ya tarutsü

nung wara/lendong balala ajurudang health system renemshia atatsü atema tenzük ta Dr. Mansukh Mandaviya-i ashi.

Dr Mandaviya-isa Mizoram nung Regional Institute of Paramedical and Nursing Science (RIPANS), Aizawl nung facility 5 lapoktsü.

Paisa Northeastern state 7- Arunachal Pradesh, Assam, Manipur, Meghalaya, Mizoram, Nagaland aser Tripura nung Pradhan Mantri - Ayushman Bharat Health Infrastructure Mission (PM-ABHIM), Pradhan Mantri Swasthya Suraksha Yojana (PMSSY) aser National Health Mission (NHM) kübok health infrastructure 80 units yanglutsü lung azüngtsü.

Sentong nung Minister of State, Department of Pharmaceuticals and Ministry of Chemicals & Fertilizers GoI Bhagwanth Khuba, Tripura Chief Minister Manik Saha, Assam Chief Minister Himanta Biswa Sarma aser Principal Director, Health & Family Welfare, Nagaland Dr. Ritu Thurr nungertem aden.

Iba sentong nung Department of Pharmaceuticals, Ministry of Chemical & Fertilizer, Government of India Secretary Arunish Chawla-i tesentepertem pelaa agizük.

Manipur CM-i Unified Command ketdangsütsüla: COCOMI

Imphal, January 12, 2024

(Agencies): Imphal Valley nungi Coordinating Committee on Manipur Integrity (COCOMI) ajanga Manipur Chief Minister N Biren Singh nem Unified Command ketdangsütsütsü takhangba agütsüogo.

State nung nübortem kümzüka ayutsü atema Manipur CM-i Unified Command ketdangsütsüla ta COCOMI-i ashi.

"Manipur Chief Minister-i Unified Command ketdangsütsü akhanger. Nübortem taküm, kiojen aser jenjang kümzüka ayutsü atema onoki iba

takhangba agütsür" ta COCOMI-i sangdong ka nung ashi.

Churachandpur district nung nisung 3 tasümgang anguba sülen COCOMI-i

Security Advisor aser Unified Command indang shilem atema ashishitepogo.

Unified Command kübok Manipur nung security tensa mejungi kümogo aser mapang shia ozüing alema inyakba aser nisung tepsetba ataloker, iba ajanga central forces-i teinyaktsü tim meinyakba sayur ta COCOMI-isa metetdaksü.

"Manipur nung central forces 70,000 mapa lemkükja liaka

civilian takütem aser kiojen kümzüka meyteter. Iba jagi parnok mapa lemküktsüba meyipa repringshitsüla aser state sorkar nem ketdangsütsütsüla" ta parnokisa ashi.

"Manipur nung security tensa majung lir aser tesüiba ita 8 tashi security advisor-i mapa meinyakteti aruogo" ta COCOMI-isa ashi.

Churachandpur district nung nisung asem tepsetba aitsür. Iba ya ajungben lendong masü saka tasa atonger nisung pezü tepset. Parnok ya süng akoi aodang tepset, ta parnokisa ashi.

NH New Delhi nung ACS & CRC den tepila sentong agi



Additional Chief Secretary aser RC, NH New Delhi mapa nungi anisüngzüksang Jyoti Kalash IAS den Nagaland House, New Delhi nung ketdangsürtem aser staff tem January 12, 2024 nü tepila sentong agidang tangokba noksa nung angur.

Dimapur, Aenjeti/January 12 (TYO): Nagaland indang Additional Chief Secretary (ACS) aser Chief Resident Commissioner (CRC), Nagaland House (NH) New Delhi mapa nungi anisüngzüksang Jyoti Kalash, IAS nem akum agüja tepila sentong ka January 12, 2024 nü NH New Delhi, 29 Dr. APJ Abdul Kalam Road nung aliba Conference Hall nung ayongzüka liasü.

Jyoti Kalash-i tensa balala nung aremzüka aser tesüngjem nung inyakba atema Resident Commissioner, NH New Delhi, Wennyei Konyak, NCS ajanga

iba sentong nung tenüngsang agütsü aser state ajungtsü asoshi inyakba atema pelaba lemsatepa liasü.

Ajidang masü Kalash ajemaluba aser nisung ajaki teyari mashi ka atema pa den jembitettsüa litetba atema tenüngsang agüja liasü.

Linük yimtiba nung alirtem dang masü saka linük tesem balala nung aliba Naga nungertem yariba asoshi Deputy Director (IPR) & Senior Public Relations Officer, NH New Delhi, Kuolie Mere-ia Jyoti Kalash dang pelaba ashi.

ACS aser CRC mapa nungi anisüngzüksang Jyoti Kalash,

IAS ajanga linük aser talisa state tenzüka bilemteta jembi aser pa RC, NH New Delhi ka ama 2011 nung arua liasü ta ashi.

Staff aser state nungi nüburtemi pa dang temeim sayuba asoshi pai pelaba lemsatepa liasü.

Temang anema lia mapa nungi anisüngzüka tepela lemsatepdang Jyoti Kalash-i takum jangratema litettsü asoshi temang anema alitsü tongtipang ta ashi.

Iba sentong nung menden ya Resident Commissioner, NH New Delhi, Wennyei Konyak liasü aser NH New Delhi staff temi temeja ken ka aten.

Kigwema nung All India NCC Trekking Camp tenzüko

Kohima, Aenjeti/January 12 (TYO): Kohima district kübok Japfu Christian College, Kigwema nung All India NCC Trekking Camp sentong January 11, 2024 nü tenzüko aser January 18, 2024 tashi alitsü.

Iba trekking camp yangbo Nagaland nung mezüngbuba alitsü, kong NCC cadets 550 dak tema den Rajasthan, West Bengal, Sikkim, Bihar, Jharkhand, Odisha aser North Eastern Region nungi Instructor staff temi shilem agitagi.

Iba camp ya Japfu Christian College, Kegwema nung January 12, 2024 nü Brig

Dipankar Saha, Group Commander, NCC Group, Kohima aser Kethosituo Sekhose, Director, Youth Resources & Sports, Government of Nagaland nati semzüko liasü.

Kasa mapang tenatisa trek ka tenzüko liasü. Iba sentong nung cadets tem den jembidang K Sekhose-i cadets tem pelashishia agizüka liasü.

Pai cadets tem dang parnok mapang peria amshia tsüngsang-mopung tajung nung jangratema amungtsü ayongzüka liasü.

Group Commander-i iba

sentong nung jembidang linük yangberba nung lanurtem shilem indang ratta ashi aser cadets tem den sensaksema liasü.

Linük balala nungi adenshiba cadets tem nem adventure tsütsü dangar inyaksangshi ajizüka pei takum nung amshidaktsütsüsa iba camp ya ayongzüka lir.

Cadets tem ya telok pezü sadanger anogo tepiyong arem min aser tenem nung senzüba nung shilem agia liasü. Parnokisa iba camp nung Kisama Heritage Village semdanga Naga nunger sobaliba angazüksü.

Advisor Tovihoto-i Poanglüm Mini Hornbill festival moatsü

Dimapur, Aenjeti/January 12 (TYO): Parade Ground, Tuensang nung January 12, 2024 nü Poanglüm Mini Hornbill Festival Lamshok (Peace Treaty) tenzüker ananü buba Advisor, Tribal Affairs and Election, H. Tovihoto Ayemi-i moaja liasü.

Iba benjongmung sentong nung jembidang, Chang aser Sumi kin külemi otsüsüa Peace Treaty zülutepba ngua pelar, ta Advisor Tovihoto Ayemi-i ashi aser nüburtem dang iba Peace Treaty ya o kisung masü saka mapa kuma amshitsü aser inyaktsü ayongzüka.

Poanglüm Festival mapang Lamshok mesüra Peace

Treaty ya tongtipang inyakyim ka lir, anungji nüburtemi telungjem asoshi nokdaktsüla, ta pai ashi.

State nung Tuensang ya Headquarters tejentiba rongnung ka asünung, asenoki wazüka ayutsüla aser dangar temia anidaktsüsa temaba jenjangi ajungkettsüla, ta Advisor Ayemi-i ashi.

Tuensang district ya tourist hotspot akumtsü teimla lir, kechiaser iba district indang otsü aser alima tebour ajung balaka lir, ta pai ashi.

Pai nüburtem dang local products, talisa jenjang (millet) wazüka aser temaba jenjangi ajungkettsü asoshi, koba

Tuensang nung kanga junga adoker.

Iba sentong nung K Khel Tuensang ajanga Chisok Lamshok, Nakshou Village nungi Jongli Chia amala agi shilem agia liasü, CKS aser Sumi Hoho tir temia o tatsütsü jembi, Sumi kin nungi Folk Fusion aser Chang Khulei Setshang aser Sumi Hoho tsüngta yimjung alitsü züngzüktepshiba agia liasü.

Iba sentong nung MLA aser Chairman, DPDB Tuensang, Imtichuba Chang host liasü. Iba sentong sülen arü atsütepba, tsük asenba, mi yangluba aser süngkum jaja amala tetoktepba agia liasü.

DC Mokokchung-i lenmang nokdangba metetdaksür

Dimapur, Aenjeti/January 12 (TYO): Dikhu ayong ajanga Mokokchung nungi Chare lenmang (shortcut) ya January 12, 2024 nü nungi tensüla lenmang ulushiba maparen matem tashi shibanga atatsü, ta Deputy Commissioner, Mokokchung, Thsuvisie Phoiji, NCS ajanga sangdong ka nung ashi.

Nagaland state kübok Dikhu ayong ajanga Mokokchung nungi Chare tashi single lane lenmang ulushia yanglushitsü mapa ya UNC Construction Co. Pvt. Ltd ajanga EPC mode nung inyaker aser yakta nüngkum/longren nungi ali tuzükba maparen inyak tenzüka machine balala aser tapoktsü osettem amshitsü, sangdong ajanga ashi.

Senzüsemponger takum lendongi meyoki aser timtem majurutsü aser mapa tetsükdaktsü makai junga inyaktettsü mechi shia aliba Mokokchung nungi Chare tashi Dikhu ajanga (shortcut) senzüba lenmang ya merenem tashi/tarutsü nung sangdong ka magütsü tashi January 12, 204 nü nungi shibanga atar, ta sangdong ajanga ashi.

Aluyimer aser jana indokba mapa nung aliba MMC sanitation truck senzütsü atema Hombarnü nungi Honibarnü tashi anüngdang 11:00-12:30 ako tsüngta aser nikongdang 3:00 ako nungi 4:30 ako tashi lapoktsü.

Iba lenmang amshirtem/lenmang nung senzürtem kumzüka ayutsü asoshi company ajanga iba lenmang nung traffic junga ketdangsütsüla.

Iba mapa inyakba mapang Company-i The Explosives Act/Rule, 2008 nung tapet ozüngtem sülen anidaktsüla.

Iba mapa inyakdang takum aser ki o jen raksatsüra Company khuret asütsü, ta sangdong ajanga ashi.

Maneni Mokokchung Tuensang lenmang nung senzürtem dang tang aliba NH-02 (Mokokchung nungi Tsutsung-Moalenden-Meyilong ajanga Chari tashi aoba) lenmang aser Mokokchung-Chuchuyimpang-Longmisa-Alisopur-Trongar-NH 02-Tuensang lenmang amshitsü ajungshir, ta DC Mokokchung ajangasa ashi.

Mokokchung DPDB senden January 16 nü amentsü

Dimapur, Aenjeti/January 12 (TYO): Deputy Commissioner & Vice-Chairman, DPDB, Mokokchung, Thsuvisie Phoiji District Planning & Development Board (DPDB) züngsem ajanga dang January 2024 atema senden ya January 16, 2024 anüngdang 11:00 ako nungi tenzüka Deputy Commissioner, Mokokchung indang Conference Hall nung amentsü, ta sangdong ka nung

ashi. Iba senden temli Republic Day anogomung asoshi renemshitsü/mapa alemtsü atema senden ka amentsü, ta Mokokchung district kübok züngsem ajanga dang January 2024 atema senden ya January 16, 2024 anüngdang 11:00 ako nungi tenzüka Deputy Commissioner, Mokokchung indang Conference Hall nung amentsü, ta sangdong ka nung

Anungji iba senden nung nüngdakbapur ajak medema arua adentsü ayongzüker, ta sangdong ajangasa ashi.

Minister G. Kaito Aye-i Kiusamnung lenmangkar lapoktsü



Dimapur, Aenjeti/January 12 (TYO): PMGSY Road Phase 1 aser 2 semzüka sentong ka public ground, Kiusam Town, Kiphire nung January 11, 2024 nü agia liasü, kong tetushi tesemdangar ka ama Minister, PWD (R&B), G. Kaito Aye-i iba sentong moatsü.

Iba sentong nung jembidang, nüburtemi tashi angaba ajanga terenlok maparen Kiusam tashi aruogo aser ano terenlok maparen tali arutsü, ta Minister Kaito-i ashi.

Saramati belt nung aliba nüburtem nem tebour tajung alinük moaja lir aser tourism asoshi teimla tulu lir, saka lenmang tesendaktep majungba ajanga itemji mataloker, ta pai ashi.

Anungji pai nüburtem dang nungi teyari meshi aser sorkari iba tesem terenlok asoshi mapa inyaktsü janra lir ta ashi.

Paisa Thonok- Kiusam - Pungro - Meluri lenmang yanglutsü asoshi temelaba atar, ta metetdaksü.

Iba sentong nung MLA, Benei M. Kamthiu, EE Kiphire, Er. Hutoshe aser ADC Kiphire, D. Robin nungeria o tatsütsü jembia liasü.

Iba sentong nung Sangkumti Village aser Kiusam Town Women Union ajanga sobaliba tsüngsang agi shilem agia liasü, kong menden T Asang Mary liasü.

Iba sentong metenzükdang minister-i Phelungre- Kiusam Zinki Bridge semzüko liasü.



January 12, 2024 nü New Delhi nung Chief of Defence Staff General Anil Chauhan den NCC Director General Lt. General Gurbirpal Singh nati NCC Republic Day Parade 2024 camp semdangba mapangtangkoba noksa nung angur.

PM Modi-i tzüym nung apu talangtiba Atal Setu semzüksüogo

New Delhi, Aenjeti/January 12 (Agencies): Hokolbarnü Ato kilonser Narendra Modi-i Mumbai Trans Harbour Link (MTHL) semzüksüogo; iba apu ya India nung tzüym tepdanga yangluba apu talangtiba lir.

Mumbai nungi Navi Mumbai tsüingda senzüsü atema ghonda ana agia aliba nungi joko minute 20 dang agitsü, ta ketdangsertemi metetdaksü.

Iba apu dang Atal Bihari Vajpayee Sewri--Nhava Sheva Atal Setu ta ajar; iba apu ajanga South Mumbai aser Navi Mumbai na sendaktepsür.

Iba apu semzüksüodang Modi-i, "Iba ya India terenlok atema asenoki telemtetba agiba kuli lir. Asenoki molutzü nunga takok ngua tzüsem raksatsütetsü," ta ashi.

Atal Setu ya apu talangtiba dang masü saka India nung tzüym tepdanga yangluba apu talangtiba lir. Iba apu ajanga Mumbai International Airport

aser Navi Mumbai tsüingda senzüsempongtsü atema mapang tatsüka dang agitsü.

Kilometer 21.8 talang apu yangludang sen crore 17,840 indokogo. Iba apu yanglutsü atema 2016 küm December ita nung Ato kilonser Modi-i foundation lung azüngtsüba sülen tesüiba küm tenet agia iba apu yangluogo.

Iba apu ajanga Mumbai International Airport aser Navi Mumbai International Airport tsüingda dang masü saka Mumbai nungi Pune, Goa aser South India tashi alutsü atema mapang tatsüba agitsü. Iba dak alia Mumbai Port aser Jawaharlal Nehru Port-a sendaktepsü.

MTHL ya six-lane lir; tzüym nung apuji kilometer 16.50 talang lir aser ali nung apuji kilometer 5.50 lir. Iba apu nung motorbikes, autorickshaws aser tractors bo senzüsü memelatsü aser tetsüng pezü aketba

garitem ghonda ka nung kilometer 100 dak tema kera senzüsü memelatsü. Apu temaleni atudang aser tsünglangleni aludangbo gariji ghonda ka nung kilometer 40 tashi dang anitsü melatsü.

Taküm January 4 nü Maharashtra state sorkari MTHL apu nung senzürtem dang gari khen senzüba nung sen 250 agitsü metetdaksüogo.

Iba apu nung senzüsü atema daily pass sen 625 aser monthly pass sen 12,500 agi angutsü.

Atal Setu apu semzüksütsü jakdang anepdang Narendra Modi-i Maharashtra kübok Nashik nung road show agia liasü. Nashik nungsa Modi-i Ramkund nung sarasadem aser Shree Kalaram Mandir nung 'pooja' agia liasü.

Swami Vivekanand asoba anogomong nung asür nem akhüm agütsüba sülen Modi-i Nashik nung 27buba National Youth Festival tenzükja liasü.

Middle East nung tensa mejungi lia Jaishankar-i Iran semdangtsü

New Delhi, January 12 (Agencies): Tang Middle East nung tensa tamajungba akümba mapang ka nung India External Affairs Minister, S Jaishankar-i Iran semdangtsü.

US-UK sepaitemi Houthi telungpurtem amakba aser External Affairs Minister Jaishankar-i US Secretary of State Antony Blinken den jembiba sülen Jaishankar-i Iran semdangtsü.

Jaishankar-i alima nung tebilemtsü onük balala lemsateptsü aser Iran nung lenirtem den senden amentsü nükjidong nung pai Iran semdangtsü.

Iran semdangba mapang nung pai Iran Foreign Minister aser Iran Tir, Ebrahim Raisi nata ajurutsü tebilemba lir, ta osang angazüker.

Iran semdangba mapang pai Israel-Hamas tsüingda rara, Houthi telungpurtemi commercial rongtem amakba aser Gaza nung nüburtem timtemba atema jembitsü.

India-i kiralongra anema nokdaker aser yimtenren nung

tajangzük angutsü atema kiralongraba sashia aitsür.

Jaishankar-isa North-South Trade Corridor, Azerbaijan-Armenian rara dak sendakba nung Caucasus nung security aser Israel-Palestine rara atema jembitsü.

India-i Houthi telungpurtemi commercial rongtem amakba aitsüba dang masü saka region nung raraba rongtema yoka liasü. India-i Saudi Arabia densema Middle-East nung tashi aliba linüktem den-a ken o jembia inyaker aser Middle-East Economic Corridor ama regional infrastructure terenlok tsütsü India ya stakeholder ka lir.

Brihostibarnü US Secretary of State Antony Blinken den jembidang Jaishankar-i Houthi telungpurtemi tzüym nung rongtem amakba tebilemtsü lemsatepa liasü.

Paisa tzüym nung security, talisa Red Sea region nung security atema India aser United States nati amalitepa inyaktsüji tongtibang, ta metetdakja liasü.



January 12, 2024 nü Nashik nung Ato kilonser, Narendra Modi-i Shri Kalaram tekülem ki semdangba mapang tangokba noksa nung angur.

Lok Sabha nung tatembangbuba Budget senden Jan 31 nungi tenzüksü

New Delhi, January 12 (Agencies): 17buba Lok Sabha nung budget senden tatembangbuba January 31 nungi February 9 tsüingda agitsü, ta Hokolbarnü Parliamentary Affairs Minister, Pralhad Joshi-i metetdaksü.

Parliamentary Affairs Minister-i X ajanga, "Interim Budget Session 2024, 17buba Lok Sabha budeget senden

tatembangbuba January 31 nungi February 9 tashi agitsü. Linük Tiri Parliament nung jembia budget senden tenzüksü. February 1 nü Finance Minister @nsitharaman-i Interim Union Budget benoktsü," ta metetdaksü.

Taküm April-May ita nung Lok Sabha election agiba sülen sorkar tasenbai tesülen budget rangben benoktsü. 17buba Lok

Sabha kümsük taküm June 16 nü tembangtsü, anungji general elections agitsü atema sangdong magütsüdag iba ya Parliament senden tatembangbuba asütsü.

2019 küm Lok Sabha elections agitsü atema March 10 nü sangdong agüja liasü aser April 11 nungi May 19 tashi nung election shilem tenet lemsar agia liasü.

Mumbai amaktsü asalentong yanglur Hafiz Abdul Salam süogo: UNSC

New Delhi, January 12 (Agencies): Brihostibarnü United Nations Security Council (UNSC)-i official sangdong ka ajanga, Lashkar-e-Taiba (LeT) telok tenteter/züngsem aser 2008 küm Mumbai amaktsü asalentong yanglur tongti Hafiz Abdul Salam Bhuttavi süogo, ta metetdaksü.

LeT telok tenteter züngsem aser Hafiz Saeed indang deputy, Hafiz Abdul Salam Bhuttavi süogo, ta UNSC-i metetdaksü.

Bhuttavi ya Punjab Province nung Pakistan sorkar ket nung lia yaküm May ita nung temelungjang tashidak agi asü. 2008 küm Mumbai amaktsü atema asalentong yanglur tongtitem rongnung pa densema liasü.

UNSC-i Bhuttavi ya kiralongrar ka, ta sangdonger liasü. LeT-i kiralongratsü atema senotsü bushiba, asalentong yangluba aser inyakba nung pai shilem agia liasü.

UN committee-i ashiba agi, pa ya LeT tentetertem rongnung ka dang masü saka Hafiz Saeed pua aliba mapang nung pa ya LeT aser JuD

naprongla nung tongti lenir liasü.

Bhuttavi ya 1946 küm August ita nung Punjab nung Kasur district kübok Pattoki nung aso aser Pakistan nung JuD seminary 150 nung pai tongti shilem agia liasü. Par jila Dipalpur ya 2008 küm Mumbai amaktem rongnung ka, Ajmal Kasab aliba jila liasü.

Lashkar-e-Taiba (LeT) ya 1990 küm Pakistan nung tenteta liasü. Jammu & Kashmir ya India kübok aliba anema nokdaksü nükjidong nung LeT telok tenteta liasü. Mezüngbo iba telok ya Pakistani Islamist organization Markaz-ad-Dawawal-Irshad (MDI) indang military wing liasü saka 2002 küm LeT-i MDI telok nungi pila.

2008 küm November ita nung Lashkar-e-Taiba züngsem 10-i anogo pezü tashi Mumbai nung tesem balala amakba mapang nung kiralongrar 9 densema nisung 175 asü aser nisung 300 dak tema pua liasü. Sepaitemi LeT kiralongrar Ajmal Kasab bo apu aser 2012 küm Pune nung aliba jail ka nung pa alenseta südaksü.



January 12, 2024 nü Nagpur nung AAR Indamer MRO facility semzükba sentong nung NCP lenir Prful Patel-i Union Minister of Civil Aviation, Jyotirditya Scindia agizükdang tangokba noksa nung angur.



TIR YIMYIM

YIMOBILEM (EDITORIAL)

DIMAPUR


KÜPTOKNÜ

AENJETI 13, 2023

Mapa agütsüba sentong

Mapa inyakner saka mangur ta alirtem asoshi mapa agütsüba sentong ka Mokokchung nung District Planning & Development Board (DPDB) ajanga tan January ita 30 aser 31 nü ayongzüka lir. Iba sentong ya Fazl Ali College nung akatsü. Nagaland nung DPDB ya district shia tenteta lir aser DPDB nung ya pei pei district nung MLA-temi anir state government office shia nung tokolaktem aser lokti tentet tongtibangtem nungi lenirtem ajak dena lir. Anungji, DPDB nungjalok, iba telok yagi pei district nung nübortem nungdak shisadanga sentong yanglua inyaker. Iba district ka asoshi kanga tongtibang yimten tashi aketba telok ka lir. Aji oda, DPDB jungra district tajung asütsü aser terenlok mapatem inyakba tsütsü district mejungra, aji DPDB majungba agi asütsü. Iba khuretji meteta, talisa, Mokokchung district nung DPDB ajanga mapang mapang shia nübortem nungdak reprangteta sentong balala apiteta inyakba angur. Item rongnung tang Mokokchung DPDB ajanga lanurtem asoshi sentong tajung ana ayongzüka agiba angur. Kaji tazüng-tashir lanurtem shirnoki government mapa nung tongti shilem agia nübortem tenzütsü atema 'Civil Service' inyaktsü jangrar, parnok asoshi NPSC aser UPSC ajanga agiba tatidangtem agütsütsü renemba maparen nung 'coaching' agüja yarir. Aser tanabubaji, tang January 30 aser 31 nü agütsüba 'Mega Job Expo 2024' ya asütsü. Mega Job Expo tetezü mapa inyakertem aika nungdakba company aser Industry tulutem mapa inyaknertem mapa tapu balala nung aniochtsü asoshi bushia arutsü. Iba ama mapa inyaktsü purtem bushia company, industry, bank aser financial institution balala lanurtem tonga anir aruba sentong ya Mokokchung district nungbo tang ya mezüngbuba asütsü. Atangji, asen lima nung dang masü saka alima ajaklen mapa manguba agi timtema aliba nübortem aika lir. Itemji zünger mapa mangurtem dang masü saka mazüngertema aika mapa mengutet timtemba purtem lir. Mapa ta asüdang, aiben, asenoki zünger mapa mangurtem asoshi jembir amai bilemer saka zünger mapa mangurtem dang nungibo mazüng ser mapa mangurtemang teimba lir. Aji oda, government nung dang masü mapa inyakdak tesem balala nung tazüngertem inyaktsüba mapatem dang nungibo mazüngertem inyaktsüba mapatemang teimba lir. Ajisüaka, asenoki itemji kidang mena yur bushiba agi mangutsü mesüra nisung kari mapa inyakertem nungdakba purtem anir arua majurutepdaksüra memetetsü. Iba nungdakji reprangteta, tang Mokokchung nung DPDB ajanga mapa inyaknertem asoshi mapa kiburtem Mokokchung tonga anir arur, anungji tazünger mazünger ta mali, mapa inyakner aser mapa bushir ajak tan January 30 aser 31 nüji Fazl Ali College nung mapa kiburtem aser mapa agütsürtem ajurui aotsüla. Item jagi nü nem nü dak alang, nai akokba mapa ka mesüra kabo agütsütetsü mesüra nai jangraba mapa ka tenzüka inyaktsü lenmang kabo sayutetsü. Ashiko, aika atema mapa kiburtem mapa inyaknertem bushia aruba ya tasen asütsü, saka mapa agütsür o mapa inyakner na ya dokan nung tayoker o talir na amai lir. Tenaji ajurutep nung dang terenlok mapa inyaktetsü. Alima tesem aika nung mapa bushirtem dang masü saka mapa inyakertem bushir saka mangur ta asüba timtem ajururtem aika lir. Itemji mapa mangurtem dang nungibo takoksaba akoksar. Aji oda, mapa inyaktsü sentong tapu aika atongtetyonga mapa inyaker melira koda sütsü? Ibayongji, mapa kiburtemi mapa inyaknertem bushia Mokokchung-i arur. Iba temoatsü aser maangka agitettsü atema Mokokchung district nungi adoker MLA-temi dang masü saka yimten yimsüsür, lokti aser arogo lenir aser tsüraburtemi lanurtem ajungshia, kokra, gari dena anepalur, iba 'Mega Job Expo 2024' sentong reprangi yoktsüla, kechiyong angu nung dang metetsü aser ajurutep nung dang ataloktsü.

ENCEPHALITIS TASHIDAK INDANG TEMETETSÜ



India nung Japanese encephalitis tashidak ya mezüng 1978 küm adok aser iba mapang tanur 6500 den timba iba tashidak agi shiranga asü.

Taküma iba tensaji mesüka atalokogo aser West Bengal, Uttar Pradesh aser Bihar nung iba encephalitis tashidak ajanga nisung aika asüba osang angazüker. Talisa asen kidangsüa aliba

Assam state nunga iba tashidak ajanga nisung 388 asüba osang taoba Brihostibar nü sangdongogo. Assam nung health ketdangsertemi ashiba agi, JE tashidak aketer nisung 2,170 tashi putetogo aser districts 27 jungnüa nung iba tashidak aliba osang metetdaksüogo.

Ano, Nagaland State Health and Welfare Department-ia August 8, 2014 nü Nagaland nung JE tashidak nisung 6 dak aliba putetogo ta osang metetdaksüogo aser ibaji asenok atema tetsübuttsü osang lir, kechiyong tanga state tem nung dang masü saka iba tashidak asen state tonga aruogo aser iba jagi asenok iba tashidak nung jenbua alitsü nungdaker.

Encephalitis ya kechi?

Tekolok waka aser timtema shirangba dang medical oshi nung Encephalitis ta ajar. Iba tashidak ya mapang shitak nung anepalu mesüra kanga majung aser taküm samatsü ana nung lir.

Encephalitis adokdaksüba:

Encephalitis ya timba virus ajanga adoker aser tekolok wakdaksüba virus aika lir. Ibala shirang adokdakba virus tem ya polio, rabies virus, varicella zoster (chicken pox virus), mumps aser rubella nungertem lir. Anosa, adenovirus, cytomegalovirus, West Nile virus aser echovirus nungertemia tekolok wakdaksür.

Encephalitis ya tapu balala lemsa lir aser itemji:

Herpes Simplex encephalitis: Iba ya HSV-1 (Herpes simplex virus type 1) virus ajanga adokdaksür.

Japanese encephalitis : Iba ya yellow fever virus sülen flavivirus ta jaloktsü aser iba tashidak ya mezüng Japan nung adok. JE ya Culex merlatem ajanga adokdatsür.

West Nile encephalitis : Flaviviridae family nung densemba virus ka ajanga iba tashidak ya adoker aser merlatem ajanga menateper.

Tick borne encephalitis : Atsüktem ajanga belenshiba virus agi Encephalitis tashidak adokdatsüba ajak dang tick-borne encephalitis ta ajar.

Tajitetsütem: Iba virus yagi tekolok miebanga aliba shilem atonger aser wakdaksür. Virus jagi brain tissue wakdaksüba den neurons raksatsür aser kenkenbo tekolok nungi azü adoka kangshir. Iba tashidak agi atongertem tekolok angotsü, mangmanga aittsü, rabaralema akümtsü aser tekong o teberem nung tashitsü atutsü. Kenkenbo aoksa temang arakzüts, teben-tetsüng tashi meiti akümtsü aser temang metaa shirangtsü akok.

Iba tashidak ya tapu ana lir, ka Primary form aser ka Secondary form lir. Ana rongnung tamajungbaji Primary form.

Japanese encephalitis mesen ya Culex tritaeniorhynchus aser Culex vishnui ta ajaba merlatem ajanga belenshir aser item merla ya tsüklu nung kanga bulua adoker. Iba virus ya ozü aser tanga shirurutem dak atemer.

Nisung mang nung Japanese encephalitis tashidakji anogo 5-15 tashi nung atemer aser iba wara menar nisung 250 nungi 1 dak dang encephalitis tashidak adoker ta asadangba osang lir.

Japanese Encephalitis Vaccine: Asian Pacific tesem nung alirtem atema Japanese encephalitis vaccine ji tongti süa agütsür. Iba vaccine ya tapu ana lir, mezüngbuba vaccine ji 2-dose series aser mezüngbuba series agütsüba sülen tanabuba series ji anogo 28 lir külen agütsür. Iba vaccine ya arishi küm 18 temapurtem nem dang agütsür. Ano, tanabuba vaccine ji series 3 lemsar agütsür aser arishi küm ka kinü nungi agütsütsü akok. Mezüngbuba series agütsüba sülen anogo tenet lir tanabuba series agütsür aser iba sülen anogo 28 lir külen tasembuba series agütsür. Vaccines anaprongla agir küm ka sülen tanaben agütsü nungdaker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Impur nung KABA-i yanglutsüba Academic building ka semzükogo



Impur, January 12 (TYO): School ka nung tesayurtem aser tanurtem sünep-sünepa sayua angazükdaktsüsü asoshi ki tajung nungdak; aji oda Kohima Ao Baptist Arogo ajanga Naga Limai Khrista Osang Tajung arur küm 150 ajungba mong nungtem nung Clark Memorial Higher Secondary School, Impur nung Academic Building

tajung ka lakh 90 shi agi yanglutsüogo aser iba ya school asoshi teyari kangasa tulu ka lir, ta ABAM Executive Secretary, Rev. Dr. Mar Pongerner-i sangdong ka ajanga metetdaktsü.

Iba Academic Building January 12, 2024 anogo nung KABA nung senior pastor, Rev. Sentsashi Aier-i meshiteta

semzüktsüogo.

"Tanü nungi iba ki tajung amshia aodang Tsüngremi tesayurtem aser tanurtem maneni jenjang temaba nung ajungketa moajangma. ABAM ajanga KABA dang mapa tajung asoshi pelaba den Tsüngremer temoatsü meshia sarasademtsür," ta kasa sangdong ajanga lemsatetep.

Pastor kati Gaza nung Khristantem yaritsü atema sen aika sarutet

January 12, 2024: Tang Israel aser Hamas telok na maneni raraba mapang America nung pastor kati Gaza nung aliba Khristantem yaritsü atema dollar sen 49,000 dak tema sarutetogo.

South Bronx nung aliba Infinity Bible Church nung missions pastor, William Devlin-i Gaza nung rara ajanga timtemer Khristantem yaritsü atema apiteta liasü.

Osangbener den jembidang pastor Devlin-i, senotsü teyari ajanga Gaza atongtsü asoshi mezüing West Bank-i tama aotsü nungdak, ajisüaka tang iba rara ajanga senotsü transfer asütsü kanga tasak kümogo, ta metetdaktsü.

"Western Union nung banks lapokli onoki senotsüji yangji aliba asen adianu aser aianutsürtem yaritsü atema yoktsü," ta pai metetdaktsü.

"Ni Catholic Arogo aser Orthodox Arogo nung lenirtem den maneni tongtepratepdar. Network junga lira aser parnoki phone charge süterta onoki mapang shia tongtepratepteter. Electric light agi anungba ajanga parnoki aiben phone charge mesüteter mesüra internet mangur, mesüra WhatsApp mamshiteter," ta pastor Devlin-i metetdaktsü.

2010 küm nung mezüing Devlin-i Gaza nung ministry mapa tenzuka liasü aser yangji charity organizations REDEEM! aser Widows & Orphans lir.

Yaküm December ita tatembanglen tashi nung Devlin indang ministry Widows &

Orphans ajanga Gaza nung Khristantem atema dollar sen 49,000 dak tema sarutetogo. United States tesem balala nungi kija kibongtem aser donominations balala nungi Arogo 52-i Gaza nung Khristantem atema melungsoa tenla agütsü.

Devlin-i, "Tsüngremi Gaza nung aliba Khrista nung asen adianu aser aianutsürtem kümzükang ta sarasademtsür. Ibaji kü teimla aser sarasadem," ta metetdaktsü.

Gaza nung nütsüing million 2.2 lir saka Khristan nütsüingbo 1,000 shi dang lir, ta pastor-i metetdaktsü.

Gaza nung jenshiba Khristantem aika Roman Catholic Holy Family Church aser Greek Orthodox Church of Saint Porphyrios nung jenoka lir. Greek Orthodox Arogo Tenla ki moapu nunga Palestine nung Khristan aser Muslim nung 500 shi jenoka liasü saka yaküm October nung Israel-i amakdang iba Tenla ki raksaja liasü.

Vietnam nung tenzükba mapa tajung inyakba atema Devlin nem 'Purple Heart' award agüja lir. Pai maneni alima tesem balala nung timtemba Khristantem yarir.

Yaküm December ita nunga pastor Devlin-i President's Volunteer Service Award ngua liasü.

Devlin-i Egypt, Gaza, Pakistan, Afghanistan aser Jordan densema linük 18 semdanga timtemba nüburtetep tenzuka aruogo.

Devlin-i Khristan lenirtem dang Gaza nung tensa süngjemba sülen Gaza semdangtsü ajungshir.

"Khristan adianutem yaritsü atema kechiba Khristan lenirtemi Gaza-i maoer? Kechiba asenoki iba tesem jagi oa parnok atema temoatsü magütsüteter?" ta pai asüngdanga liasü.

"Parnoki teyari nungdaker; parnoki sarasadem nungdaker. Yisu Khristai asenok atema inyaktsüba ama parnokia (Gaza nung Khristantem) asen teyari nungdaker," ta pai ashi.

Yaküm October 7 nü Hamas teloki Israel amakba mapang nungi Israel aser Hamas na rara tenzuka liasü. Gaza nung aliba St. Porphyrios Greek Orthodox Arogo nungia züingsem 150 dak tema ki raksago aser parnok aika Tenla kidang jenoka lir.

Tamalen Friends of the Holy Land CEO, Brendan Metcalfe-i, "Iba rara ajanga Gaza nung Khristantem tamajungba kongshir; Khristantem aika Tenla kitem aser Tenla ki moaputem nung jenoka lir. Orthodox Tenla kidang yirurtem Catholic Tenla kidangi oa lir; yangji yirua alir nisung 100 shi lir. Teyari balaka nungdaker tanur 100 shi lir aser parnokji Sisters of Charity-i anepalua repringdar. Yangji nisung ajak senteper nisung 1,000 shi lir aser parnoki mozi aser tanga nungdak balala atema anogo shia dollar sen 1,000 shi nungdaker," ta metetdakja liasü.

ANOGO ABEN TSÜNGREM DEN

Talila Talubusa

Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaktsü akoker. Efesa 3:20.

Tsüngrem asoshi aser Pa arogo asoshi mapa meranga inyakba agi asenoki Tsüngrem peladaktsür ta bilemer. Aji saka Tsüngremi nisung tesüngmangtsü ka yangluba nisung tejangraba agi Pa peladaktsür (T.Ken 8:3-4). Tsüngremi na ajanga inyakba mapa dang nungi tuluba nai ne sasa ne alizüing ayutsü makok. Tangar dang nungi tali Tsüngrem peladaktsüsü asoshi Tarsus nung Saul mapa tangar dangi tali pai meranga inyak, saka pai meranga inyak nung Tsüngremi pa taküm asoshi inyakba den medemdang dang pa mapaji jana rüja dang liasü ta pai bushitet. (Fil. 3:7-8).

Asenok tebilemetsüji aseni yangluba sentong nunga aseni melamela jangratemer. Asenoki tamaren mapa inyaktsü merangra asenok taküm nung tashi teperi akatsüla, iba jagi Tsüngremi asenok dang pelatsü ta bilemer. Tsüngrem nungi tajaba asenoki mangashi tashi asen taküm indang asenoki nukla dangi arutsü makok mesüra Tsüngremi asenok ajanga ataloktsüsü taaka bilemetsü makok.

Asenoki bilemba dang nungi Tebui Pa aini asen tashi mait atendanga oa angur ta asenok sasa bilemettsü tenüngdaktsü lir. Asenoki asen tebilembaji tesülen yutsütsüla. Asenoki asen pungmangtem nung temulung süa malitsüla kechiaser itemji kechi koma jangratemtsü südir süang teti atema masü. Kodang asenoki Tsüngremi tuyuba nung odir asen taküm nung Tsüngrem mapa inyakba aseni metettsü aser ibaji Pa tashi ain dena aliba ajanga dang rasaa ashitsü akok. Ajak nung asenok koda temulung süa alitsü?

Yaküm lanur 7,800 dak temai Khrista agizük: Youth For Christ

January 12, 2024: America nung youth ministry telok kati, 2023 küm lanur 7,800 dak temai Yisu Khristaji pei taküm nung Kibur südaktsüsü ta nangzükogo, ta metetdaktsü.

Englewood, Colorado nung aliba Youth for Christ teloki 2023 Ministry Report metetdaktsüogo aser iba report nungji 2022-23 küm parnok ministry mapa balala ajanga lanur 7,855-i Khrista agizük, ta metetdakja lir.

2021-22 küm den medemdangra iba ya shilem 7 agi teimba akümba lir, kechiyong iba kümji lanur 7,323-i Khrista agizüka liasü.

Youth For Christ-i talisa arrshi küm 11 nungi arrshi küm 19 pur lanurtem dak rangoker ministry mapa inyaker. Parnoki sentong balala ajanga item ama lanurtem den Tsüngremi agütsüba teimla lemsateper.

Youth For Christ-isa, lanurtemi pei medemertem den pei tamang jenjang lemsatepba kanga bulua kümogo; 2022 küm den medemdangra 2023 küm

nung pei medemertem den pei tamang indang lemsatepbaji shilem 25 agi teimba aküm, ta metetdaktsü.

Kasa report nung aliba "Summer In Review" section nung ministry-i youth summer camps nung inyakba mapatem lemsatepa lir. Item camps atema chapter 130 nem training agütsür aser lanurtem nungdak repringteta sentong ayongzükua katsür.

"Generation Z lanurtemi (arrshi küm 11 nungi 26 purtem) pei medemer mesüra züingartem den sadoksadoka pei tamang jenjang indang lemsateper," ta Youth for Christ CEO aser Tir, Jake Bland-i metetdaktsü.

Jake Bland-isa, Tsüngrem yimlibilem ajanga tanur 2,907-i ministry nung shilem agia Khrista dak teimla aliba osang proker, ta metetdaktsü.

Youth for Christ ya 1944 küm tenteta liasü. Canada, England aser United States nung lanurtem atema sentong aika ayongzükua agiba sülen iba ministry tenteta liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Shiok

(v) osang bener yok (sent message)
* Arogo pur arutsü jelia osang shiok.

Shipo

(n) shiruru tepo (animal teeth)
* Shiti aser pongzü po ya jenjang tasak kümogo.

OLONG PAITEP # 6665

1			2					3		
4								5		
							6			
										8
		9								
								10		
11								12		
13										

TIPIEN

- 2. Mapa anepalua inyakba - (8)
- 4. Anakshinüa ait - (5)
- 5. T _____ zük - (4)
- 9. Aria bilemtep - (7)
- 11. Kidang metsüba ozü ka - (4)
- 12. Tzüma aser ali nung aliba shiruru ka - (5)
- 13. Teka kolepdak - (8)

LANGTSÜNGLEN

- 1. Teka nung enokba oset ka - (7)
- 2. Teptsü - (4)
- 3. Nok amshia raratep - (6)
- 6. Ninang tapu ka - (4)
- 7. Nüji masü - (4)
- 8. Taruba küm - (7)
- 9. Teka shitok - (6)
- 10. Süoshi agi mapet - (4)

OLONG PAITEP # 6664 TELANGZÜBA

TIPIEN:

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN:

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Noksa nung Mumbai Trans Harbour Link angur. I ba apu ya Prime Minister Narendra Modi-i January 12, 2024 nü lapoktsü. MTHL ajanga Mumbai aser Raigad district kübok Nhava Sheva sendakteper. I ba trans harbour link dang Atal Setu ta ajar aser iba ya India nung 'longest sea bridge' lir. Rs 17,840 crore endoka yangluba Mumbai Trans Harbour Link (MTHL) nung lane 6 lir aser tzüyim madak kilometre 16.5 talang lir.

BJP candidate DT Lepcha-i Sikkim Rajya Sabha MP inyaktsü



Gangtok, January 12, 2024
(Agencies): Sikkim nung Bharatiya Janata Party (BJP) candidate Dorjee Tshering Lepcha-i Rajya Sabha MP inyaktsü shimogo.
BJP candidate Lepcha den tetokteper shinga melii Rajya

Sabha election nung takok nguogo.
Iba election atema Lepcha-i dang tenüing agütsü aser pa indang nomination papers reprangba sülen pai takok anguba osang metetdaksü.
Returning Officer Lalit

Kumar Gurung ket nungi Lepcha nem Rajya Sabha election certificate agütsü.
Dorjee Tshering Lepcha ya Sikkim nungi kümsük punguben tashi MLA ka lira ser pai asemen tashi minister inyakogo.

February ita nungi Assam nung school tasen 500 yanglutsü

Guwahati, January 12, 2024
(Agencies): Taküm February ita nungi Assam nung school 500 yanglu tenzüksü ta Assam chief minister Himanta Biswa Sarma-i ashi.
"Taküm February ita onoki school tasen 500 atema lung azüngtsü" ta CM Sarma-i ashi.
The Assam legislative assembly is set to sit for budget session from February 05.
State Assembly nung anti-polygamy law agizüktsü ta paisa ashi. February 5 nungi

Assam legislative assembly budget session tenzüksü.
"Assam budget session nung anti-polygamy law yanglutsü atema onoki kanga merangdar" ta Assam CM-isa ashi.
Assam sorkari Brihostibarnü 'Mukhyamantri Mahila Udyamita Asoni' ta ser tetsürtem asoshi scheme ka tenzüksüogoo.
Assam nung self-help groups (SHGs) lakh 7 den sendaktepa aliba yimtsüing

nung alir tetsür million 3.9 yaritsü atema iba scheme tenzüksüogoo.
State sorkari iba scheme mezüing tenzüka aodang Rs 3,900 crore endoktsü.
"Prime Minister Narendra Modi alizüing atongtsü atema scheme tenzüksür aser iba alizüingji linük nung lakhpati didis crore 2 yaritsü atema lir.
Tanü onoki yimtsüing nung alir tetsür lakh 39 nem Rs 35,000 financial assistance agütsütsü" ta Asam CM Sarma-i ashi.

Mizoram-i Assam den arrtsü ken o atema border committee tentet

Aizawl, January 12, 2024
(Agencies): Mizoram sorkari Assam den arrtsü ken o tem atema border committee ka tentetogo.
Mizoram sorkari tentetba committee nung chairman state home minister K Sapdanga aser vice chairman forest minister Lalthansanga lir.
Border committee nung member secretary inyaktsü atema Mizoram home secretary H Lalengmawia shimogo.
Iba committee nungsa Adviser to Mizoram CM (political) Lalmuanpuia Punte, chief secretary aser DGP nung dena lir.

Maneni, T Romana College - Joseph K Lalfakzuala, MNF, INC, BJP, AAP o ZPM political party tem nungi teshimtet nübo kaka aser NGOCC, CYMA, MUP, MHI., MZP, o MSU NGOs den Inner Line Forest Reserved Demand, Mizoram JAC nungi teshimtet nübo kaka dena lir.
Assam aser Mizoram chief minister tem tan ita ajurutepa arrtsü ken o atema olemteptsü akok.
Mizoram CM Lalduhoma-i Assam CM Himanta Biswa Sarma na den ajurutepa Northeast state tem tsüingda arrtsü ken o onüktem lemteptsü.

North Eastern Council (NEC) plenary session nung Assam CM Himanta Biswa Sarma aser Mizoram chief minister Lalduhoma na ajuruteptsü imlar.
January 19 nü Shillong nung North Eastern Council (NEC) plenary session agitsü sentong lir.
NEC plenary session ya union home minister Amit Shah menden ser amentsü.
Assam aser Mizoram tsüingda kilometre 164.6 agi arrtsütepa lir. British yimsüsüba ajanga 1875 aser 1933 nung anaben tashi arrtsü ladangba ajanga arrtsü ken o ya adok.



Meghalaya nung Garo Hills region nung alirtemi mapang talangka nungi aginüa aruba ama Hokolbarnü Tura nung Raj Bhavan complex tasen lapokogo. Tanü Meghalaya Governor Phagu Chauhan-i video conferencing ajanga Raj Bhavan lapoktsü aser iba sentong nung Chief Minister Conrad K Sangma, Assembly Speaker Thomas A Sangma aser MP Agatha K Sangma nungertem aden.

GOVERNMENT OF NAGALAND
DIRECTORATE OF INDUSTRIES & COMMERCE

ADVERTISEMENT

Pradhan Mantri Kaushal Vikas Yojana Centre
PMKVY

Training & Placement Programme (Fully Sponsored by Ministry of MSDE, Govt. of India) at Nagaland Tool Room & Training Centre

S.No	Job Roles	Duration	Eligibility
1	Welder Fabrication (MMAW)	2 Months	8 th passed
2	Electrician	2 Months	10 th passed
3	Mechanic (Four wheeler Service Assistant)	2 Months	8 th passed
4	Plumber	2 Months	8 th passed

Features

- Free of cost Training Course, Fooding & Lodging
- Placement Assistance after completion of training

List of documents to be submitted:

- Educational Qualification Certificate
- Aadhaar Card (should be link with mobile Number)
- Bank Passbook
- Passport size photo (2 copies)

Sd/- Shri. A. Temjen Jamir
Director & CEO (NTTC)

LIMITED SEATS

CONTACT NO. 8837426161 / 8413870785 / 8974444806 (M)
New Industrial Estate, Sub-Jail Junction (Tinali), NH-36 Road, Dimapur : Nagaland, Pin - 797 113.
• Website: www.nttcdimapur.org.in/ • Email ID: nttcdimapur@gmail.com

Office of the
Aoli Longpok Semchir Lemtur Mungdang
H.Q: Mokokchung

KONANG TETUSHI AGÜTSÜR

Dr. Achila, D/o Lt. Lulunjungshi Lemtur, Sungratsu, lai sorkar wadang nung temaba menden Director, Department of Animal Husbandry and Veterinary nung jenjang tajung nguteta konang tetushi tulu bener arutsüba atema tepela tetushi Mungdang Office ajanga lemsateper.

Tarutsü nung Tsüngremi la wadang nung temoatsü, azüakru tulu lidakjang ta sarasademtsür.

Sd/- Lipokyanger Lemtur
President

Sd/- Tayongtemsu Lemtur
Secretary

GOVERNMENT OF NAGALAND
DIRECTORATE OF INDUSTRIES & COMMERCE

ADVERTISEMENT

Pradhan Mantri Kaushal Vikas Yojana Centre
PMKVY

Training & Placement Programme (Fully Sponsored by Ministry of MSDE, Govt. of India)

Sl.No	Job Roles	Duration	Eligibility	SPOT ONLINE REGISTRATION
1	Carpenter (Shuttering)	2 Months	5 th passed	
2	Tailoring	2 Months	8 th passed	

Features

- Free Training Course, Fooding & Lodging
- Placement Assistance after completion of training

List of documents to be submitted:

- Educational Qualification Certificate
- Aadhaar Card (should be link with mobile Number)
- Bank Account Details
- Passport size photo (2 copies)

Sd/- Shri. A. Temjen Jamir
Director & CEO (NTTC)

Venue: Kudatech Skill Centre
Near Lorna's Hr. Sec. School. Walford Colony, Dimapur.

Contact Numbers: 8880786541 / 8729858406 / 8794517743 (M)

TEACHERS WANTED

Applications are invited from interested candidates (experienced/fresh) to teach in a school in Chuchu Town under Mokokchung district.

Sl No	Subject	Qualification
1	Maths	M.Sc / B.Sc.
2	Science	M.Sc / B.Sc.
3	English	MA / BA (English)
4	Hindi	Hindi Graduate (Ratra 2) with 10+2 (Hindi/English medium) to teach up to Grade 8.
5	Montessori Teacher	Graduate with Montessori Trained

Interested candidates may mail handwritten application and resume (along with relevant documents and contact number) to greenhillsacademy2012@gmail.com on or before 25-January-2024

Britain-i Ukraine nem sen billion £2.5 teyari agütsütsü: Rishi Sunak



London, Aenjeti/January 12 (Agencies): Taküm UK-i Ukraine nem mitkar teyari sen billion £2.5 agütsütsü ta Ato Kilonser Rishi Sunak-i ashi, koba Russia-i amak tenzüker Britain-i küm ka nung teyari agütsüba tulutiba alitsü.

Ato Kilonser-i iba osang ya Ukraine semdangba mapang sangdong, kong pai long-term security asoshi yariteptsü atema tezüngzüktep tasen ka agitsü.

Iba teyari yagi Ukraine nem long-range missiles, air defence aser artillery shells agütsütsü, ta ketdangsurtemi ashir.

Sen million £200 shi drones nung indoktsü aser itemji timba UK-i yangluba alitsü.

April ita nungi tenzüksü aliba taruba financial year atema mitkar asoshi teyari ya ajanga Ukraine nem drones

atema sen million £18, Ukraine indang energy infrastructure ulushitsü teyari aser online English oshi training atema senotsü tali alitsü.

Item drones yagi aruya aliba küm Ukraine asoshi teyari tulu alitsü ta Armed Forces Minister James Heapey-i ashi.

"Tesüiba küm ana tsüngta Ukraine nung onoki anguba nungi ajak anagzüka kera yangluba drones tem lir," ta pai ashi.

Iba teyari ya ajanga Europe nung Ukraine nem teyari timtiba agütsür jenjang tanabuba nung UK aliba sayur ta pai ashi.

2022 küm November ita tatesa Ukraine semdangsang Sunak-i ashiba agi, "Tanü ni yangi osang ka bener arua lir: UK atsüanem makatsü. Tamang tia nunga liang aser tarutsü nung mapang tajung nunga onok Ukraine den nokdaksü."

"UK ya Ukraine tembar tajung ka lir, kechiaser par security ya ozüing security ama züngshir," ta pai ashi.

"Tanü onok tali aor, mitkar teyari timba kumtsür, drones tasen meyirijang aika agütsür aser mapang talangka asoshi nüngdakba atema Ukraine nem agütsütsü security agreement tasen ka züluteper."

(Maneni tapak 8 nung...)

China tetsüngtai ia Myanmar nung yimjung asoshi jemb

Yangon, Aenjeti/January 12 (Agencies): Myanmar nung 2021 küm mitkar lenirtemi yimten tashi rakzüka sülen ita aika mitkar aser telungpur telok balala tsüngta rara arudang nisung noklang aika takum agiba sülen ceasefire alitsü Hokulbarnü sangdong.

October ita nungi Myanmar north tsütsü Shan state nung rara agi sünger liasü, kong ethnic minority telok balala lungiemer mitkar anema rara tenzü.

Parnok yagi jila aser arütsülen tesem aika amokbang, koba China den shishilempatsü asoshi tongtipang liasü.

"China lenisüba nung China south tsütsü Kunming yimti nung senden ka amen. Onok ceasefire alitsü tezüngzüktep ka agiogo," ta mitkar indang odongtar Zaw Min Tun-i ashi.

Telungpur telok balala lungiemer tentetba alliance nung züngsem Ta'ang National Liberation Army (TNLA) nungi Tar Bhone Kyaw-i ashiba agi, parnoki China den shishilempatsü atema arütsü tanaben lapoktsü mulungogo.

China-ia ceasefire ya Hokulbarnü sangdonga liasü.

"Telok anaprongi tangsa ceasefire alitsü, mitkartem yoka

aliba meyipa arudaksütsü aser mangatettep bentettsü aser yimjunglen nungi jembishinütsü mulungtep," ta foreign ministry odongtar Mao Ning-i ashi.

China tetsüngtai ia Myanmar den arütsüa aliba Yunnan province kübok Kunming yimti nung Bodhbar aser Brehostibarnü jembishinüa liasü, ta lai ashi.

Ajisüaka Mao-i iba ceasefire ajanga koba tesemsa awajemtsüar masü.

Taoba hopta iba alliance yagi linük north tsütsü online scam operations atema nüngtugu jila ka amokbangogo ta shia liasü aser ibaji mitkar asoshi ano takoksa tuluka liasü.

November ita nungi nüburttem Laukkai jila nungi jena oa liasü, koba China den arütsüa aliba district ka nung lir aser Myanmar mitkar den sendaktepa aliba militia tem kübok liasü, kong ozüing alema sen sayiba, takep ayokba aser online scams tem kanga bulua liasü.

Alliance nungya TNLA, Myanmar National Democratic Alliance Army (MNDAA) aser Arakan Army (AA) lir aser jila ya parnok kübok lir ta parnoki ashir.

(Maneni tapak 8 nung...)

Tanü 32 buba MDCA Inter Club Cricket Tournament final asayatsü

Dimapur, Aenjeti/January 12 (TYO): 32 buba MDCA Inter Club Cricket Tournament final nung defending champion Titan CC aser Trebuchet CC tsüngta maneni asayatsü.

Imkongmeren Sports Complex, Mokochung nung iba asayamung league stage nung Titans CC yagi tera agi dang Trebuchet CC madak takok ngua liasü.

Anungji Trebuchet telok ya iba tayang kepzüksü renema lir, anungji iba asaya jangratemtsü asütsü.

Titans ya semi-final nung Sovran CC madak wicket 7 agi takok ngua final atong. Toss asayaba nung Sovran-i akok aser mezüng bat amtsü shimer Titans asoshi target runs 96 yanglua yutsü.

Iba asaya nung Sovran nung Merenchemba-i runs 42 aser Moanungsang-i runs 20

yangluteta liasü. Tena dak alaka par telok nungi shingai runs toku dak tema meyanglutet.

Titans nungi Tongpang aser Longsasunep nati wicket asem-sem agia liasü.

Iba target arishidang Titans temi wickets asem dang akoksar overs 13.3 nung menepa liasü.

Titans nungi Andrew-i runs 41, Longsasunep-i runs 28 (not out) yangluteta liasü aser Salangdangba-i dang wicket asemprong agia liasü.

Iba takok ya ajanga Titans CC ya maneni iba asayamung final atonger, koba küm asem nung asember final asayar alitsü aser tesüiba asayamung ana parnoki koka lir.

Hokulbarnü mezüngbuba semi-final nung Trebuchet teloki toss koka mezüng bat amtsü shimtet aser overs 20

nung runs 165 agitet aser wicket pongu out süa liasü. Trebuchet nungi Talikaba aser Bablu Deka nati runs 44 aser 38 yanglua liasü.

Skylark CC nungi Vijay Rai-i wicket ana agi aser runs 20 agütsü aser Temjenmeren-i runs 36 agütsür wicket ana agia liasü.

Skylark CC yagi overs 20 nung runs 134 dang yanglutet aser wicket 9 out asü. Skylark nungi mezüng bat amer temi par telok asoshi sapang kecha meyanglutet. Tsünglanglen alirtemi tajungba asayatetba ajanga parnoki runs 134 ya yangluteta liasü.

Trebuchet nungi Imnayanger aser Chubaodang nati wicket ana-na agia liasü aser runs 31 agi iba asaya akok.

Honibarnü iba asayamung final ya anepdang 10:00 ako nungi tenzüka asayatsü lir.

Malaysia Open: Satwik aser Chirag na tebur semi tongogo

Kuala Lumpur, Aenjeti/January 12 (Agencies): Hokulbarnü India nung badminton asayar Satwiksairaj Rankireddy aser Chirag Shetty nati China nung Ren Xiang Yu aser He Ji Ting na straight set nung takok ngua Malaysia Open Super 1000 tournament semifinal tongogo.

World number 2 nung aliba India nung tebur tarep asayar ana yagi taoba küm Asian Games nunga gold medal ngua liasü aser minute 35 nung world number 32 Yu aser Ting na madak 21-11, 21-8 agi takok ngua liasü.

India nung seed tanabuba nung alisang ana yagi semifinal nung Korea nung Kang Min Hyuk aser Seo Seung Jae na mesüra Malaysia nung seed tasembuba nung aliba Aaron Chia aser Soh Wooi Yik den asayatsü.

Kasa asayamung tetsür tarep quarterfinals nung India tsür Ashwini Ponnappa aser Tanisha Crasto na Japan tsür

Rin Iwanaga aser Kie Nakanishi nati 15-21, 13-21 agi tsükdakja liasü.

World number 24 nung aliba India tsür ana yagi Brehostibarnü asayadang taoba world number 1 aser anaben world champions Mayu Matsumoto aser Wakana Nagahara tsükdaktsü, saka Iwanaga aser Nakanishi den kasa masayateti minute 39 buba nung asaya tembang.

Ibai world number 15 nung aliba Japan tsür tarep asayari India tsür tarep asayar tanaben tsükdaktsüba alitsü. Taoba ita Lucknow nung Syed Modi International Super 300 final nung tena ya Japan tsür Iwanaga aser Nakanishi nati tsükdakja liasü.

Ponnappa aser Crasto nati Guwahati Masters Super 100 akoba den taoba ita Lucknow aser Odisha nung asayamung ana finals tonga liasü.

Satwik aser Chirag nati 2023 küm asayamung trok tashinung takok ngua liasü.

Adelaide International: Sebastian Korda tsük, Jelena Ostapenko final tongogo

Adelaide, Aenjeti/January 12 (Agencies): Hokulbarnü Jiri Lehecka-i seed tasembuba nung alisang Sebastain Korda madak 6-2, 6-1 agi takok ngua Adelaide International tennis asayamung (tebur kija asaya) final tongogo aser Jelena Ostapenko ya tetsür kija asaya final tongogo.

Memorial Drive nung asayadang Lehecka-i America nungba kanga junga amokbanger asayatet aser minute 73 nung asaya adem.

Czech Republic nungi seed tenet buba nung alisang Lehecka ya Honibarnü final

nung Britain nung Jack Draper mesüra Russia nung seed ti buba nung alisang Alexander Bublik den asayatsü.

1998 Australian Open champion Petr Korda jabaso Sebastain Korda yagi kanga junga masayatet aser arishi küm 22 tain Lehecka ya tennis asaya tenzüker final tanabuba tongogo.

"Yamai junga asayatetba atema ni terabo süngmanger. Saka yamai asütsüsa ni asaya. Final asayatsü ni pelar," ta Czech nung Lehecka-i ashi.

Kasa asayamung tetsür semi-finals nung Latvian tsür

seed trok buba nung alila Ostapenko-i Russia tsür Ekaterina Alexandrova madak 6-2, 7-6 (7/3) agi akok, anungji Hombarnü ranking tasen sayaba nung la ya küm trok nung mezüngbuba top 10 nung züngsemstü.

Tang rank 12 nung alila aser taoba mapang French Open champion, Ostapenko ya iba asayamung takok marok asoshi ano Russia tsür Daria Kasatkina den asayatsü, shiba nem America tsür seed tanabuba nung alila Jessica Pegula-i temang majungba mechi walkover agüja liasü.

ISL: Adrian Luna melena Cernych shimogo



Kochi, Aenjeti/January 12 (Agencies): Kerala Blasters nung yirur alisang Adrian Luna shibai melentsü ta bilema arur tang Lithuania nung forward Fedor Cernych-i melenogo.

"Season tatem tashi tenanzüktepba yangluogo. Luna temang tajungba küma taruba season nungibo asayatsü imla atar," ta source kati ashi.

"Asayar anaprongla aser club-i mulungtepaka transfer ya medical dak sendaka lir koba mapang tatsüka tsüngda

tembangtsü," ta source-isa shisem.

Cernych ya Super Cup sülenang team nung adentsü aser pa Indian Super League nung taruba asaya nungi asayatetsü.

Cernych ya Russia nung Lithuania nung kibong ka nung aso aser pa Vilnius, Lithuania tetsü o tebou nati anitet. Pa LFF II League club Granitas Vilnius nung 2007 küm mezüng asaya-a football career tenzüker iba sülen pa 2009 küm

Dnepr Mogilev-i ao.

Pa 2012 küm Naftan Novopolotsk-i loan nung yok aser küm ana sülen Polish club Gornik Leczna-i ao. 2018 küm pa Russia club Dynamo Moscow nung oa aden aser 2019 küm FC Orenburg-i loan nung yok. 2020 küm maneni pa Jagiellonia Bialystok-i meyipa ao.

Pa 2012 küm mezüngbuba linük team nungi asaya aser pai goal 12 tashi idakja liasü.

Cernych ya club jenjang nung asayaba mapang timba left winger ama asayar, ajisüaka pai centre forward ama-a asayateter. Kasa mapang nung Luna timba centre midfield position nung asayar aser aiben striker ama asayar.

Luna yiruba sülen Vibin Mohanan pa melena asaya aruogo. Osang ajanga ashiba agi, Blasters management-i forward line akangshitsü atema attack süa asayaba asayar ka aginüa liasü.

Britain-i Ukraine nem sen billion... (Tapak 7 nungi...)

"Küm ana Ukraine-i tasü ita Russia den rara aru. Parnok tanga rarar, par linük aser nüchiso aser democracy wazüka ayutsü temulungtetba masetshi."

Mitkar sentongtem yanglutsü atema Ukraine nem tekeraba nung teyari agütsüla asü, ta MP temi ita aika jembia aruba sülen UK-i tang iba mera ya agir.

United States aser European Union nati teyari magütsüteti lia iba osang ya angazüker, kechiaser Ukraine ya shells aser missile tali kanga nüngdaker.

US nung Republican temi Ukraine asoshi sen billion \$60 (£47bn) teyari agütsütsü aliba nokdanga America south tsütsü arütsülen migration azüokba

nung indoktsü meranger.

Aser EU nunga Hungary Ato Kilonser Viktor Orban-i Brussels den mangatettep aliba mechi Ukraine nem teyari sen billion €50 (£43bn) agütsütsü aliba nokdanga liasü.

Tanü UK-Ukraine tsüngta tezüngzüktep agiba nungya NATO nung Ukraine madandang Russia-i tashiyim amshiba nokdangtsüsa mitkar aser rongsenketzung tsütsü teyari lir.

G7 linüktem nungi iba ama tezüngzüktep zülutepba ya UK mezüngbuba alitsü ta ketdangsurtemi ashir. Alima nung industry tsütsü taka-taiter linük tenet yagi taoba küm Vilnius nung NATO senden amendang nangzüka liasü.

China tetsüngtai ia Myanmar... (Tapak 7 nungi...)

Myanmar aser China arütsülen artillery shell apok ta taoba hopta osang angashiba sülen iba rara ajanga China nung takum samar aser nüburtem kumzüka ayutsü asoshi nüngdakba mera ajak agitsü ta Beijing-i mepelaba shia liasü.

Beijing-i taoba ita Myanmar mitkar aser allied ethnic armed groups tsüngtai ia jembishinüa khen asoshi ceasefire alitsü

mulungtep ta shia liasü.

Ajisüaka iba sülena Shan state tesem kar nung maneni rara aser China indang embassy ajanga par nüburtem dang arütsülen nungi ainshitsü ashi.

Telok ajaki China arütsülen alirtem aser Myanmar nung China sepaitem nem timtem magütsütsü nangzük, ta odongtar Mao-i Hokulbarnü ashi.

BILEMDANGANG

"Mapa tilatiba nunga nü tanüla, temulung aser tekolok shisatsü agütsüra yangji tajangzük lir."